



Број/Број: **01/2а-50-1-2-66/10**

Сарајево/Sarajevo: 25.5.2010.

ZAPISNIK

66. sjednice Komisije za vanjske poslove Predstavničkog doma Parlamentarne skupštine BiH, održane 24.5.2010.

Sjednica Komisije počela je u 12 sati. Prisustvovali su: Slavko Matić, Husein Nanić, Azra Alajbegović, Lejla Klokić i Denis Bećirović.

Odsustvovali: Milica Marković, Azra Hadžiahmetović, Milorad Živković i Sefer Halilović.

Osim članova Komisije, sjednici su prisustvovali: Momčilo Novaković, poslanik u Predstavničkom domu PSBiH, Edin Šehić iz Ministarstva vanjskih poslova BiH, Nenad Vujičić i Vera Letica iz Ministarstva finansija i trezora BiH, Samir Šlaku iz Ministarstva za ljudska prava i izbjeglice BiH i Zoran Šajinović iz Ministarstva odbrane BiH.

Sjednicom je predsjedavao Slavko Matić. On je pozdravio prisutne i otvorio raspravu o dnevnom redu 66. sjednice Komisije.

Nije bilo rasprave, pa je predsjedavajući Komisije Slavko Matić konstatirao da je za 66. sjednicu Komisije jednoglasno usvojen sljedeći

DNEVNI RED

1. Usvajanje Zapisnika 65. sjednice Komisije;
2. Davanje mišljenja o saglasnosti za ratificiranje:
 - a) Sporazuma o finansiranju između Bosne i Hercegovine i Komisije Evropskih zajednica u vezi s horizontalnim programom o nuklearnoj sigurnosti i zaštiti od zračenja, u okviru Instrumenta za prepristupnu pomoć u 2008. godini (resorno ministarstvo: Ministarstvo finansija i trezora BiH);
 - b) Sporazuma o finansiranju i projektu između KfW, Frankfurt na Majni, i Bosne i Hercegovine i Federacije Bosne i Hercegovine i Javnog preduzeća "Elektroprivreda Hrvatske zajednice Herceg Bosne" d.d. Mostar (EP HZHB) – *Projekat Dopunske mjere za Vjetroelektranu Mesihovina* (resorno ministarstvo: Ministarstvo finansija i trezora BiH);
 - c) Evropske povelje o regionalnim i manjinskim jezicima – *Strazbur, 5. 11. 1992.* (resorno ministarstvo: Ministarstvo za ljudska prava i izbjeglice BiH);
 - d) Sporazuma o vojnom grantu između Vijeća ministara Bosne i Hercegovine i Vlade Republike Turske, Provedbeni protokol o finansijskoj pomoći između Ministarstva odbrane Bosne i Hercegovine i Generalštaba Republike Turske i Logistički provedbeni protokol između Ministarstva odbrane Bosne i Hercegovine i Generalštaba Republike Turske (resorno ministarstvo: Ministarstvo odbrane BiH);

3. Rasprava o Inicijativi poslanika Momčila Novakovića za razmatranje na sjednici Doma sljedeće tačke dnevnog reda: “Odgovornost članova Predsjedništva BiH za vođenje vanjske politike BiH u svjetlu posljednjih izjava pojedinih članova”;
4. Izvještaji i materijali pristigli Komisiji:
 - a) Liberalizacija viznog režima za Bosnu i Hercegovinu (materijal MVP-a BiH);
 - b) Nota Ambasade Španije – Predstavljanje Evropske unije u BiH (materijal MVP-a BiH);
5. Tekuća pitanja.

Ad. 1. Usvajanje Zapisnika 65. sjednice Komisije za vanjske poslove

Zapisnik 65. sjednice usvojen je jednoglasno, bez primjedbi.

Ad. 2. a) Davanje mišljenja o saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u vezi s horizontalnim programom o nuklearnoj sigurnosti i zaštiti od zračenja, u okviru Instrumenta za pretpristupnu pomoć u 2008. godini

Vera Letica iz Ministarstva finansija i trezora BiH kazala je da je ovo IPA finansijski sporazum za 2008. godinu, te da je ovo horizontalni program Evropske komisije što znači da se odnosi na šest zemalja u regionu plus Kosovo. Sporazum je koncipiran na osnovu sposobnosti prihvatanja obaveza iz članstva i približavanja evropskim standardima. Evropska komisija prepoznala je da u regiji postoji nedostatak u dijelu reguliranja nuklearne sigurnosti kao i kapaciteta regulatornih tijela po pitanju nuklearne sigurnosti i radioloških pitanja. Iz tog razloga je za 2008. godinu izdvojeno u okviru ovog programa 7.030.000 eura i ta sredstva se odnose na sve zemlje. BiH učestvuje u dijelu “unapređenje kapaciteta regulatornog tijela” i regulatorno tijelo je osnovano, što je bio i uslov za učešće naše zemlje u ovom programu, i to je Državna regulatorna agencija za radijaciju i nuklearnu sigurnost. Ovim programom upravlja centralizirano Evropska komisija u saradnji s Međunarodnom agencijom za atomsku energiju, tako da je naša zemlja tu samo korisnik, a naš dio zbog kojeg je potpisan ovaj sporazum je 1.010.000. eura, kazala je na kraju Vera Letica.

Nije bilo pitanja i članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 2. b) Davanje mišljenja o saglasnosti za ratificiranje Sporazuma o finansiranju i projektu između KfW, Frankfurt na Majni, i Bosne i Hercegovine i Federacije Bosne i Hercegovine i Javnog preduzeća “Elektroprivreda Hrvatske zajednice Herceg Bosne” d.d. Mostar (EP HZHB) – Projekat Dopunske mjere za Vjetroelektranu Mesihovina

Nenad Vujičić iz Ministarstva finansija i trezora BiH kazao je da ovaj sporazum predstavlja grant u iznosu od 1 milion eura za finansiranje Vjetroelektrane Mesihovina. Ovaj grant kofinansira kredit od 71 milion eura koji bi se trebao naći na narednoj sjednici Komisije. Sporazum proizilazi iz finansijske saradnje između BiH i SR Njemačke iz 2007. godine i ovim grantom finansirat će se stručne usluge za izgradnju Vjetroelektrane Mesihovina čime će se smanjiti nesrazmjerna potrošnja električne energije u 36 općina.

Nije bilo pitanja i članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 2. c) Davanje mišljenja o saglasnosti za ratificiranje Evropske povelje o regionalnim i manjinskim jezicima – Strazbur, 5. 11. 1992.

Slavko Matić kazao je da mu je drago da smo u prilici konačno dati saglasnost za ratifikaciju ove povelje, jer je u svim posljednjim izvještajima Monitoring tima Vijeća Evrope neusvajanje ove povelje stavljeno kao primjedba.

Samir Šlaku iz Ministarstva za ljudska prava i izbjeglice BiH kazao je da se u posljednje dvije-tri godine zajedno s Ministarstvom vanjskih poslova BiH radi na ratifikaciji ove povelje, te da je ratifikacija Povelje o regionalnim i manjinskim jezicima postprijemna obaveza BiH nakon prijema u članstvo Vijeća Evrope.

Članovi Komisije jednoglasno su dali pozitivno mišljenje Predstavničkom domu u vezi s ratifikacijom Evropske povelje o regionalnim i manjinskim jezicima – Strazbur, 5. 11. 1992.

Ad. 2. d) Davanje mišljenja o saglasnosti za ratificiranje Sporazuma o vojnom grantu između Vijeća ministara Bosne i Hercegovine i Vlade Republike Turske, Provedbeni protokol o finansijskoj pomoći između Ministarstva odbrane Bosne i Hercegovine i Generalštaba Republike Turske i Logistički provedbeni protokol između Ministarstva odbrane Bosne i Hercegovine i Generalštaba Republike Turske

Denis Bećirović predložio je da, zbog kratkog vremena koje on ima, Komisija da mišljenje o ovom sporazumu bez izlaganja predstavnika Ministarstva odbrane BiH Zorana Šajinovića, s čim su se saglasili ostali članovi Komisije.

Članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 3. Rasprava o Inicijativi poslanika Momčila Novakovića za razmatranje na sjednici Doma sljedeće tačke dnevnog reda: “Odgovornost članova Predsjedništva BiH za vođenje vanjske politike BiH u svjetlu posljednjih izjava pojedinih članova”

Slavko Matić zamolio je predlagača ove tačke Momčila Novakovića da upozna članove Komisije o smislu i namjeri ove inicijative i kazao da Komisija treba da se izjasni o potrebi da se ova tačka nađe na dnevnom redu sjednice Doma.

Momčilo Novaković je kazao da neće ulaziti u sam sadržaj tačke i da je za njega prihvatljiv naziv tačke dnevnog reda “Odgovornost članova Predsjedništva BiH za vođenje vanjske politike” bez dijela u kojem se kaže “u svjetlu posljednjih izjava” ako bi to za nekog od članova Komisije bilo sporno. On je kazao da član 47. Poslovnika o radu Predsjedništva BiH govori da će Predsjedništvo BiH nastojati konsenzusom donositi odluke, pa i kad je u pitanju vanjska politika, a član 171. Poslovnika Predstavničkog doma propisuje da Predsjedništvo BiH, na zahtjev Doma, izražava svoje stavove i izvještava dom o pitanjima koja spadaju u njegovu nadležnost. Dodao je da je njegova namjera i ideja da, ako ovo bude na dnevnom redu, treba zatražiti od Predsjedništva BiH da dostavi informaciju o vođenju vanjske politike.

Denis Bećirović pitao je da li se to odnosi na sva tri člana Predsjedništva BiH ili na jednog ili dvojicu.

Momčilo Novaković rekao je da misli na Predsjedništvo BiH, dakle na tri člana Predsjedništva BiH, te da je stoga i saglasan da se iz naziva tačke izbace riječi “u svjetlu

posljednjih izjava". Naglasio je da je njegova ideja bila da se govori o vođenju vanjske politike od strane Predsjedništva BiH i o odgovornosti njegovih članova u vođenju vanjske politike, te da ništa nije usmjereno ni na jednog člana Predsjedništva BiH posebno.

Denis Bećirović rekao je da misli da nije produktivno sada, tri-četiri mjeseca prije izbora, izvlačiti jedno po jedno pitanje i tražiti neku odgovornost, te da pogotovo misli da Parlamentarna skupština BiH sad nema politički kredibilitet za uvrštavanje ovakvih stvari u dnevni red. Rekao je da to kaže zbog toga što misli da je ovaj parlament definitivno najgori od kada postoje četvorogodišnji mandati, najgori sa stanovišta šta je planirao a šta je urađeno. Dodao je da je rad Vijeća ministara BiH katastrofalan, kao i rad entitetskih vlada. Rekao je da misli da je Momčilo Novaković imao dobre namjere kad je ovo predlagao, ali je predložio da Komisija ne prihvati ovaj prijedlog da predloži Domu ovu tačku dnevnog reda iz navedenih razloga.

Azra Alajbegović izrazila je dilemu kako Komisija, sa aspetka ustavnih nadležnosti Predsjedništva BiH, stoji u vezi s pitanjem pozivanja Predsjedništva BiH na odgovornost. Kazala je da ne misli da Komisija ne treba raspravljati o domenu vanjske politike, da daje svoje opservacije i mišljenja, ali da je odgovornost nešto što ima respektabilnu specifičnu težinu. Zato je zatražila od sekretara da to pojasni, nakon čega bi se odredila o ovom pitanju.

Husein Nanić je rekao da on bježi od načina da mi generalno osporavamo nečije izjave, jer svako treba da ima slobodu davanja izjava. Dodao je da misli da bi uvrštavanje ovakve tačke u dnevni red sjednice Doma dovelo do politizacije i da ne bi mogli dobiti ništa korisno za BiH, za Parlament i za vođenje vanjske politike. Rekao je da će zato biti suzdržan kad je u pitanju ovaj prijedlog.

Predsjedavajući Matić je rekao da je teško ne složiti se s Momčilom Novakovićem i razlozima koji su ga rukovodili da predloži ovakvu tačku dnevnog reda i s ugrubo nabrojanim slabostima Predsjedništva BiH u vođenju vanjske politike, ne ulazeći u sadržaj same tačke dnevnog reda. Dodao je da ne želi polemizirati s Bećirovićem o tome kako je ovaj parlament loš ili najlošiji. Rekao je da je očito da PSBiH sa svoja dva doma nije uradila puno toga u ovom mandatu, ali da on misli da je ovo najlošija struktura Predsjedništva BiH od kako se bira tročlano Predsjedništvo, te da itekako ima potrebe za raspravu o njihovom radu. Naglasio je da bi uvrštavanje ove tačke u dnevni red, kako god da bi je formulirali, rezultiralo raspravom sa suprotstavljenim stavovima.

Poslije rasprave u vezi s pitanjem Azre Alajbegović, predsjedavajući je odgovorio da bi Komisija, ako bi ova tačka dnevnog reda dobila podršku, zatražila informaciju od Predsjedništva BiH, što ne bi značilo pozivanje ni na kakvu odgovornost. Dodao je da je upitno u odnosima članova Parlamentarne skupštine BiH i Predsjedništva BiH, koji su direktno birani, da li Parlamentarna skupština BiH može usvojiti bilo kakav zaključak koji će pozivati na odgovornost članove Predsjedništva BiH.

Momčilo Novaković rekao je da je očito da je inicijativa pogrešno shvaćena. Nije namjera da Parlament utvrđuje odgovornost članova Predsjedništva BiH, nego se radi o odgovornosti Predsjedništva BiH za vođenje vanjske politike jer ono jeste odgovorno. Rekao je da je Predsjedništvo BiH dužno Parlamentu dostaviti pravce djelovanja vanjske politike. Dodao je da on ne vidi šta je sporno da Predsjedništvo BiH dostavi informaciju o realizaciji dokumenata koji su bili na Parlamentu, te da on misli da se na Komisiji ne opredjeljuje o značaju ovog što piše ovdje, već se opredjeljuje o članovima Predsjedništva BiH.

Husein Nanić je na prethodnu diskusiju Novakovića odgovorio da se to ne podrazumijeva jer SDA nema svog člana u Predsjedništvu BiH, ali da on kao poslanik u državnom parlamentu želi da zaštiti dignitet i Parlamenta i Predsjedništva BiH, i u tom smislu nadležnosti koje Komisija ima. Podsjetio je da je prije godinu dana od Ministarstva vanjskih poslova BiH zatražena informacija o DKP mreži i da to nismo dobili, te da je bila rasprava u Parlamentu i da to nije završeno, a da apsurd bude veći, on je kroz poslaničko pitanje tražio

da mu se dostavi u elektronskoj formi i da ni tako nije dobio informaciju. Rekao je da on jeste za to da se traži informacija od Predsjedništva BiH o vođenju vanjske politike u okviru poslovnih mogućnosti, ako postoji neka vrsta dobrih odnosa između Parlamenta i Predsjedništva BiH, ali ako bi ova tačka bila na dnevnom redu sjednice Doma, ne bi se postiglo ništa.

Predsjedavajući Komisije Slavko Matić zatražio je da se Komisija izjasni o tome da li podržava prijedlog da se u dnevni red sjednice Doma uvrsti tačka: "Odgovornost članova Predsjedništva BiH za vođenje vanjske politike".

Poslije glasanja, konstatirao je da je jedan glas bio "za", dva "protiv" i dva "suzdržana". Konstatirao je da je prijedlog dobio negativno mišljenje Komisije.

Ad. 4. Izvještaji i materijali pristigli Komisiji:

- a) Liberalizacija viznog režima za Bosnu i Hercegovinu (materijal MVP-a BiH);**
- b) Nota Ambasade Španije - Predstavljanje Evropske unije u BiH (materijal MVP-a BiH);**

Edin Šehić iz Ministarstva vanjskih poslova BiH kazao je da je, što se tiče informacije o liberalizaciji viznog režima za Bosnu i Hercegovinu, velika većina stavova potvrđena na nedavnom sastanku delegacije Vijeća ministara BiH s Evropskom komisijom, koju je predvodio ministar sigurnosti BiH Sadik Ahmetović, gdje je prezentiran izvještaj Evropske komisije o napretku BiH po pitanju vizne liberalizacije. Činjenica je da u javnosti postoje razna viđenja i zvaničnika i članova Evropskog parlamenta i da postoje neke izjave koje u suštini nemaju uporišta u realnosti. Isto tako je činjenica da je posljednji izvještaj koji je sačinila Evropska komisija o napretku BiH po pitanju liberalizacije viznog režima, koji nam je prezentiran 6. 5.2010. u Briselu, konstatirano da smo napravili ogroman napredak ali s jednom rezervom po pitanju provođenja obaveza iz bloka 3. gdje spadaju javni red i sigurnost. Postoje još neka pitanja kao što su usaglašavanje entitetskih zakona s Krivičnim zakonom BiH, pitanja održivosti rada institucija, provođenje akcionih planova za borbu protiv organiziranog kriminala, jačanje administrativnih kapaciteta agencija za provođenje zakona. Najavljeno je kao čvrst stav da će se tokom ljeta uputiti još jedna evaluaciona misija za blok 3. On je dodao da se na političkom nivou može osporavati da li smo mi imali isti tretman kao i ostale države koje su dobile bezvizni režim, ali je na ovom sastanku rečeno da će početkom jeseni sve biti riješeno i da će BiH dobiti bezvizni režim.

Predsjedavajući je konstatirao da je Komisija primila k znanju ova dva izvještaja.

Predsjedavajući Matić konstatirao je da nema tema pod tekućim pitanjima i zaključio sjednicu.

Sjednica je završena u 12,45 sati.

SEKRETAR KOMISIJE

Merdžana Iglica

PREDSJEDAVAJUĆI KOMISIJE

Slavko Matić

Dostavljeno:

- naslovu
- a/a